



# UMP anjur Wacana Ilmu Profesor Bersama Masyarakat

Profesor merupakan golongan profesional dan intelektual yang memiliki ketajaman pemikiran, inovasi serta kepakaran dalam pelbagai bidang. Sumbangan dan cetusan idea golongan ini diperlukan dalam merealisasikan aspirasi negara menjadi sebuah negara maju.

Justeru, dalam membudayakan perkongsian ilmu, Universiti Malaysia Pahang (UMP) menganjurkan program Majlis Profesor Bersama Masyarakat dengan menampilkan tokoh akademik dari Universiti Islam Antarabangsa Malaysia (UIAM), Profesor Dato' Dr. Sidek Baba dalam membicarakan tajuk 'Melayu Sepakat Islam Berdaulat'.

Dalam majlis ini, Dekan Pusat Bahasa Moden & Sains Kemanusiaan (PBMSK), Profesor Dr. Abd. Jalil Borham bertindak sebagai moderator sepanjang program yang disertai lebih 500 tetamu yang terdiri daripada guru-guru, pengetua dan warga UMP di Dewan Astaka UMP Gambang pada 15 April 2013 yang lalu.

Profesor Dato' Dr. Sidek dalam bicaranya berkata, tradisi muafakat sudah menjadi amalan masyarakat Melayu dalam menjalankan hubungan baik antara satu dengan lain, begitu juga sikap tolong-menolong dan bergotong-royong yang perlu dikekalkan dalam mewujudkan perpaduan di negara ini.

"Malah, orang Melayu ini adalah sebagai kelompok yang boleh menjadi contoh kepada masyarakat majmuk di Malaysia yang terdiri daripada rakyat berbilang kaum tanpa menafikan peranan kaum lain untuk kemakmuran sejagat.

"Dalam konteks kerajaan di Malaysia, kita perlu berbangga dengan kepercayaan dan penerimaan masyarakat termasuk yang bukan Islam terhadap pelaksanaan kaedah patuh syariah sama ada melibatkan perniagaan, perbankan Islam dan pelaburan yang dijamin lebih adil.

"Malah, di samping membangunkan teknologi tinggi, masyarakat juga perlu mensantuni proses pengislaman ilmu dan kemahiran berfikir untuk membangunkan masyarakat," katanya yang turut memberikan contoh tokoh terkemuka Islam seperti Al-Khawarizmi, Al-Biruni, Al-Jazari dan tokoh yang berjaya mencipta sesuatu untuk disumbangkan kepada masyarakat.

Profesor Dato' Dr. Sidek turut menyarankan agar generasi baharu 'Y' yang selalu inginkan perubahan agar tidak melupakan sejarah dan perlu mendalami pengetahuan Islam dengan penuh penghayatan.

Katanya, adalah wajar mereka membuat perbandingan dengan negara Islam yang lain terutamanya dari sudut keamanan dan kemakmuran di sesebuah negara itu.

Beliau turut menekankan pentingnya nilai integriti dan berlaku adil dalam kebenaran kerana sebarang keputusan yang salah boleh memberi kesan kepada nasib anak bangsa pada masa akan datang.

Katanya, seperti juga ahli akademik yang menjalankan penyelidikan, setiap informasi yang diterima perlu dianalisa, dikaji dan dibuat hipotesis dalam memastikan setiap maklumat tepat dan berfakta.

Majlis turut dihadiri Naib Canselor UMP, Profesor Dato' Dr. Daing Nasir Ibrahim, Timbalan Naib Canselor (Akademik & Antarabangsa), Profesor Dato' Ir. Dr. Badhrulhisham Abdul Aziz, Timbalan Naib Canselor (Penyelidikan & Inovasi), Profesor Dato' Dr. Rosli Mohd. Yunus dan Timbalan Naib Canselor (Hal Ehwal Pelajar & Alumni), Profesor Dr. Yuserrie Zainuddin.

